

**Autori:**  
**Lebit Murtishi**

**Redaktor:**  
**Zekë Krasniqi**

**Përgatitja kompjuterike:**  
**Kadri Sherifi**

**Kopertina:**  
**Kadri Sherifi**

**Shtypi:**

**Tirazhi: 1000 copë**

*Lebit Murtishi*

*Pelegrinë*

*Në*

*Janinë*

*(poezi)*

*cikli i parë*

/

*„përtype të shkretën fjalë“*

- 1) *Shqipëri!*
- 2) Pelegrinë në Janinë
- 3) Çamëri!
- 4) Mermëni udhëtarë...
- 5) Atdhe
- 6) Vendnumërim!
- 7) Buzëqesh Pranverë
- 8) Këngë lulesh
- 9) I dua lulet
- 10) Mallkim mbi Kosovë...

## ***Shqipëri!***

Mos thuaj  
se s` më ke bir,  
mos thuaj  
se s` më ke djalë,  
Përtype  
të shkretën fjalë  
se më dhemb  
ky Shpirt i vvarë...

Mos thuaj  
se më ke fqj  
edhe në s` më mer në gji,  
Përtype  
të shkretën fjalë  
se më dhemb  
ky Shpirt i vvarë...

08.03.2006

Bern

*Pelegrinë në janinë...*

mot për mot  
njëherë shkoni  
pelegrinë në janinë,  
shkoni  
varret numëroni  
në çdo kodër  
e lëndinë...

shkoni Ooo...  
njëherë në mot  
pa bërë kujë  
e pa lot,  
se lëndoni kapedanë  
që pushojnë mbi jataganë...

shkoni  
një grusht ujë pini  
në krojet e çamërisë,  
shkoni  
mu në mesolongji 1)  
ku fle nderi shqipërisë...

Tek pashai  
mos marroni  
ngjeshur jataganë të shkoni,  
zgjo taborët të m` i thoni,  
jemi Shqipëria thoni...

15.06.2006  
Bern

1) Vend ku është varrosur heroji Marko Boçari

## ***Çamëri!***

Mos rënko  
kaq me dënesë  
shpresë e lodhur n` ëndërrim  
gjersa i fundit  
bir të mos vdesë  
do jesh dhè i dheut tim...

25.05.2006

Bern

### *Merrmëni udhëtarë...*

Ju udhëtarë  
të paqes së brishtë  
me ëndrrën diellore në duar,  
merrmëni,..  
merrmëni të dëgjoj  
këngën e trishtë  
të palcës së tokës së bluar...

merrmëni...  
pelegrinë të lodhur  
të paqes së brishtë,  
merrmëni.  
Mes malesh me yje të flaktë  
më çoni  
që vdekjen ta pres shqiptarisht...

25.06.2006

Bern



### ***Atdhe***

S` mjaftoi Berlini,  
as Londra s` qe mjaftë  
egërsisht prët trungun  
tash Vjena e lashtë.

n` emër tënd kosovë  
ca horra kokëtrashë  
varret e Prizrenit  
po t` i hedhin jashtë...

këndellu Kosovë,  
thuaj ç` emër ke,  
ti veç Shqipërisë...  
tjetër nënë s` ke...

31.05.2006

Bern

***Vendnumërim !***

Kohët shkelin  
njëra-tjetrën  
ora jonë  
mat vetveten...

01.01.2000

Bern

## *Buzëqesh pranverë*

Për këngët që këndohen  
në kopshte dashurishë,  
për trimat që qëndrojnë  
në ballë të shqipërisë...

për lulet që po çelin  
të kuqe shesh më shesh,  
për trimat\_lapidarë  
pranverë buzëqesh...

08.03.2006

Bern

### ***Këngë lulesh***

Qeshi oxhaku,  
qeshi  
dhe kënga  
në djep t` ajkunës.

Në dallgë zjarresh  
linden  
nga hiri  
bij të fortunes...

...qeshi pranvera  
me këngë lulesh...

12.06.2006  
Bern

***I dua lulet***

i dua lulet  
që lidhin rrënjët  
në rrënjë guri  
shtatin në rrudhat  
e shkëmbit...

i dua lulet  
që erë e ngjyrë  
i kanë të flamurit.

27.06.2006  
Bern

***Mallkim mbi Kosovë***

Që kokërr gruri të mos mbijë  
Që pike uji mos pikojë  
Që ylli shpresës mos vallëzojë  
Që dielli most ë diellzojë  
Që hëna kurrë qilim mos shtrojë...

Po grur i ri pranverën zgjoi  
Dhe pikë e shiut lumë shkoi  
Dhe yll i shpresës vallëzoi  
Dhe dielli ëndrrat diellzoi  
Dhe hënë e plotë qilima shtroi...

26.06.2006

Bern

*cikli i dytë*

//

*„baladë pylli“*

- 1) *Tinguj të vendlindjes*
- 2) Baladë pylli
- 3) Lirikë malli
- 4) O e shanjta ime gurrë...
- 5) Në krastën time
- 6) Ti këngë Frëngove 1)
- 7) Shpirti im udhëtar...
- 8) Psherëtimë
- 9) Ladorisht

## *Tinguj të vendlindjes*

Lermëni,  
bri këtij shkëmbi  
lirika dhimbjesh  
sott ë mbledh...

lermëni,  
këngën e malit  
damarëve  
te ndiej thellë...

lermëni,  
tek ky burim  
nën këngën  
e shenjtë të malit...

lermëni,  
këtu mes lulesh,  
lermëni  
të vdes prej mallit...

prill - 2006



### ***Baladë pylli***

Mes pyllit të egër  
unë shkoj  
dhe zëra baladash dëgjoj,  
të zhurmët  
pranverën e ndiej  
në këngët e çdo përroi...

mes pyllit të egër  
me ferra  
sa udhë të lashta janë zënë,  
s` e ndiej më  
kollën e pleqëve  
as hijen e tyre të rëndë...

mes pyllit të egër  
pa udhë  
unë shkoj balada të mbledh  
ndër shtigje të mbyllur,  
pa gjurmë  
ku pleqtë e moçëm kanë shkelë...

dhe zgjohen  
kujtimet e brishta  
kur ujë me grusht pi në lumë,  
dhe shkoj mes pyllit pa udhë  
nën qiellin e mbushur – furtunë...

16.06.2006

Bern

### *Lirikë malli*

I rashë malit  
mes përmes  
pyll më pyll  
e shteg më shteg,  
pa një cak  
si zog pa fletë  
ku më çonte  
malli vetë...

Putha kroje,  
gurë, drurë,  
putha shtigje,  
putha gjurmë,  
putha lule manushaqe,  
putha lotin tim në faqe...

O shpresë  
e rilindur,  
O agimi im i artë!  
puthma këtë lot në faqe,  
puthma këtë lot të zjrtë...

13.04.2006

Bern

*O e shenjta ime gurrë...*

lejomë  
pak ujë të pi,  
jam udhëtar  
i mbetur n` udhë,  
lejomë  
me grusht të pi  
o e shenjta ime gurrë...

lejomë  
o ime gurrë,  
jam udhëtari  
zemërgur,  
lejomë të kem fëmijë  
t` ia them këngës si dikur...

06.06.2006

Bern

### ***Në krastën time***

i prek me dorë  
gurët e lashtë të bardhë,  
i prek e i puth me radhë  
si copë guri  
që jam...

dhe flas me gurët  
në krastën e lashtë të bardhë,  
unë,  
që gjuhë e zemër  
nga ato gurë  
i kam...

22.06.2006  
Bern

*Ti këngë frëngove* 1)

Në keni mall  
për krojet e lashtë  
të këngës së moçme pleqërishte  
dhe sofrën e shtruar  
Bujarisht;

në keni mall  
për këngën me nëntë  
dhe fjalën e dhënë  
trimërisht...

...dhe në heshtë historia  
si ç` ka heshtur dymijë vjet  
" Është Jona Shqipëria" 2)  
do t` ia thotë Frëngova vet...

24.06.2006

Bern

1) frëngova – fshat në rrethin e strugës

2) këngë që i kushtohet ismail qemalit

***Shpirti im udhëtar...***

O tinguj të magjishëm  
të vendit tim krenar  
gjëmoni sot furishëm  
për shpirtin tim udhëtar...

O male të vendlindjes  
të Shpirtit tim udhëtar  
në vdeksha sot prej dhimbjes  
askush të mos më qajë...

Askush asgjë mos thotë  
për kohën që m`u tret  
se rrugëve të botës  
unë mjaft kam qarë vet...

25.05.2006

Bern

## ***Psherëtimë***

E ndiej malin  
si mer frymë,  
e ndiej dallgën  
si rënkon...

e ndiej gjethin  
si vdes nën brymë  
dhe psherëtimën  
që lëshon...

29.05.2006

Bern



## ***Ladorisht***

Jam yt bir  
o Shenjti im,  
udhëtar i pakufi,  
sado largë  
ne të dy  
Ti je unë,  
unë jam Ti...

06.06.2006

Bern

*cikli i tretë*

///

*„këtu dhimbja pagëzohet“*

- 1) *Pas kohës...*
- 2) Jam udhëtar...
- 3) Në mesrrugë...
- 4) Paradoks
- 5) Mërgim
- 6) Këngë e erës
- 7) Bie borë...
- 8) Sytë e vdekjes...
- 9) Urti
- 10) Ky Mister...
- 11) Enigmë!
- 12) Këngë diellore
- 13) Det!
- 14) Këngë e kavallit!
- 15) S` mërzitem
- 16) Ç` udhë të marr...
- 17) Është poezi kjo...

## *Pas kohës*

pas kohës së mbetur  
vrapoj,  
drejt erës së çmëndur  
një shteg të ri  
kërkoj;

Vrapoj pas ëndrrës së lashtë,  
se s` dua,  
as gjallë as vdekur  
nën hije kufomash të roj...

24.06.2006

Bern

***Jam udhëtar...***

pikë loti

jam

n` oqeanin e dhimbjes paanë,

shtruar jam në sofrën e mallit,

mbështetur

në ëndrrën e bardhë...

pikë loti

jam

në udhët qiellore paanë,

kam Shpirtin të mbushur me zjarrë

unë kokëkrisuri

i marrë...

02.06.2006

Bern

*Në mesrrugë...*

S` jam pranverë  
e perënduar  
as jam zjarr  
as hi i shuar;

as thëngjill  
nën hi i mbetur  
as qiri  
nën flakë tretur...

në mesrrugë  
jam i lënë  
gjysma Diell  
gjysma Hënë...

27.06.2006  
Bern

## ***Paradoks***

Ecim pranë të tjerëve  
bëjmë sikur nuk shohim,  
ecim pranë mjerimit  
të mjerin s` e njohim...

pranë vehtes ecim  
vehten e kërkojmë,  
veç përballë pasqyrës  
rrugën e dredhojmë...

19.03.2005  
Bern

## *Mërgim*

Këtu  
s` këndohen  
këngë të moçme  
as krisma pushkësh  
s` dëgjohen...

këtu lindin fëmijë  
e nuk pagëzohen!

Këtu  
shpatë e fatit  
në palcë farkëtohet,  
këtu,  
veç dhimbja pagëzohet...

02.06.2006  
Bern

### *Këngë e erës*

Jam këngë e erës  
lindur në dallgë,  
jam bir furtune  
me hap të zjarrtë...

Jam këngë guri  
nga gjoksi i malit  
kam ngrënë me lotë  
bukën e mallit...

Jam këngë gjëmimesh  
të tokës mëmë  
ndaj pres i lumtur  
të vdes më këmbë...

29.05.2006

Bern



***Bie borë...***

Bie borë  
në sytë e mi  
si dikur  
në fëmini...

Më perqesh  
këngë e natyrës  
pse më zbret  
një lot fytyrës...

08.03.2006  
Bern

***Sytë e vdekjes...***

përgjojnë  
sytë e vdekjes  
këngët  
në pranverë që bulëzojnë  
dhe rrugët kah dielli që çojnë.

sërgjojnë  
sytë e vdekjes  
me barrën e rëndë të urrejtjes...

15.09.2000  
Bern

***Urti***

loti është  
pasqyrë e Shpirtit  
dhe  
stoli e Hipokritit...

01.01.2000

Bern

***Ky Mister...***

Kjo ëndërr  
s` më le të shqitem  
nga fijet e hershme të jetës,  
Ky mister  
i besdisshëm  
do më ndjekë  
gjer buzë vdekjes...

15.11.2000

Bern

***Enigmë!***

qava shumë sot,  
ndoshta nesër  
Qesh  
nëse më le vdekja  
në këtë Kohë-Lesh...

29.08.2000  
Bern

***Këngë diellore***

Ti,  
do të vish  
o këngë diellore;  
e kuqe,  
e zjarrtë  
e me nder,  
ti,  
do të vish  
o këngë e artë  
me agun e parë  
në Pranverë...

14.06.2006

Bern

***Det!***

Në sa limanë  
kjo peshë malli  
shperndan dhimbjen  
sot  
o Zot...

Det i kaltër  
furtunë ëndrrash  
reh me valë  
gjokse nënash...  
Det  
o Det...

09.04.2006  
Durrës

***Këngë e kavallit!***

Ulërimë Shpirtërore  
nga fund-ferri  
sikur vjen,  
agoninë njerëzore  
këngë dhimbjesh  
e ushqen...

08.03.2006

Bern



***S` mërzitem...***

s` mërzitem  
që m` i shajnë këngët.

S` mërzitem që thyejnë dhëmbët  
ata që në vend të kokës  
mbi jastëkë mbajnë këmbët...  
s` mërzitem!

27.06.2006

Bern

*Ç` udhë të marr...*

Në zemrën tënde  
që të vi  
ç` udhë të marr  
nuk e di...

Të vi me këngë  
si Orfe!  
apo i shkrehur  
si rrufe...

Nuk e di  
ç` udhë të marr  
por do të ndjek  
edhe nën varr...

13.04.2006  
Bern

*Është poezi kjo...*

Dy sy  
të qeshur  
nga zjarri parë...

dy yj  
të ndezur  
nën qiell të larë...

thëngjill  
i heshtur  
mbetur nën hi...

kujtesë  
e largët  
që ther në gji...

06.06.2006

Bern